

Ces deux Familles estant partis pour aller chercher leur prouision de chair d'Elan, François Xauier, iadis nommé des siens Nanaskmat, retourna avec la plus grande partie de ses gens deux iours auant la faincte Quarantaine; comme il n'auoit que de la chair & de l'anguille boucanée, nous ne luy parlâmes point de l'abstinence de viande qu'on garde en ce temps là, mais luy l'ayant appris par la communication de nos François, nous dit qu'il desiroit garder ceste loy, puis qu'il estoit Chrestien; nous luy répondîmes, que n'ayant ny pain ny pois, en vn mot, n'ayât pour tous mets qu'un peu d'anguille seiche, qu'il n'estoit pas obligé à ceste rigueur: Il repartit, que les mesmes raisons qui nous induisent à ne point manger de viande, l'y obligeoient; puis qu'il n'auoit qu'une même créance avec nous, & qu'il auoit assez de force pour se [67] pouuoir passer à vn peu de poisson fumé. Ceste réponse nous toucha le cœur, & nous fit refoudre de le soulager luy & sa fille du peu que nous auions, c'est à dire, d'un peu de pain & de pois, & quelquefois d'un peu de moulé. Voila donc le pere & la fille dans l'abstinence, & par fois dans le ieufne, pendant que le reste de la Famille qui n'estoit pas encor toute baptisée, mangeoit de fort bonne viande. Entrant vn iour qu'ils ieufnoient dans leur chambre, ie les trouuay tous deux retirez à part, faifans collation sur le soir avec vn peu de pain, puis me tournant de l'autre costé, i'apperceuy vne grâde marmite remplie de langues & de mufles d'ornac, qui rendoient vne fort bonne odeur, ces viandes les plus delicates de la beste estoient préparées pour les gens: Le vous confesse que ce spectacle m'étonna; en effect c'est vne chose étonnante de voir vn homme chef de sa Famille, apres